

Ebbaluḅa eyi Pawulo gaḅandiihira Filimooni Enyanjula

Ebbaluḅa yino Pawulo gayiḅandiihira Filimooni (1:1). Era gayiḅandiihira mu komera, hamunga e Rooma. N’aba ni gaali e Rooma, hitegeesa hiiti gwali mu mwaha ogw’enkaaga namulala oluvanyuma lw’ohusaaliwa hwa Kurisito. Era ehyo nj’ehiseera ehi gaḅandiihiramo n’ebbaluḅa ya Bakolosaayi.

Filimooni gaali mulala hu hibbubbu hy’abafugiiirira Kurisito mu hibuga Kolose era gaali n’abeedu mu mago gage. Onesimo gaali mwidu wa Filimooni. Lulala, Onesimo nga geeba musengwawe Filimooni, ng’ahena amudulumaho. Pawulo gamuḅandiihira n’amusunga ataboneresa Onesimo. Mu magambi agaali ni gaḅuga obufuzi w’Abarooma, Filimooni gaali w’edembe ohwita Onesimo. Pawulo ahubbirisa Filimooni afugiiirire Onesimo ng’omuutu omunyaaha mu Kurisito. (13-14).

Ebiri mu bbaluḅa yino mu buupi

1. Pawulo aheesa Filimooni (1-3)
2. Pawulo asunga Filimooni afugiiirire Onesimo ng’oboluganda mu Kurisito (4-21)
3. Pawulo ategeha ohuhyala (22-25)

¹ Ese Pawulo, omusibe hu lw’ohuḅeeresa

Yesu Kurisito, ni Temuseewo mulebe yeefe, kunandiihira ewe Filimooni meeri yeefe omuhoda era omutambi wahyefe, ² ni mboojo yeefe Afiya, n'owahyefe Arikipo yeesi oweenayo ohuhola omulimo gwa Yesu hyefe, ko n'abafugiirira Kurisito bosibosi abahumbaanira mu mago ewuwo.

³ Hatonda Seefe ni Musengwa Yesu Kurisito babanjambire ehisasabirisi era babanje emiyaaya.

Ohufugiirira n'ohwenda hwa Filimooni

⁴ Habuhyabuhya ni saba sikaya huhonya hu siina liryo ni neyaasa Hatonda olw'ewe, ⁵ olwohuba binjolera ng'olu ofugiirira Yesu Musengwa era n'engeri eyi wendamo abagwalaafu bosibosi. ⁶ Saba ti omuhumba ogu oli ni nagwo n'abafugiirira bahyo gwemeede ohujangala ni gwema hu hufaanika huhwo ebi-ranji ebi Hatonda atunja, era hino hyolerere olw'ohujeesa Kurisito enono.

⁷ Owoluganda, engeri eyi wendamo abaatu yiipa esangaalo eryene ery'amaani era yingobosamo amaani; olwohuba ebi ohola bigobohi-iseemo abagwalaafu amaani.

Ohusunga hwa Pawulo eyiri Filimooni

⁸ Olw'ehyo, wayire ng'omuhwenda wa Kurisito nahali kulagira bulagire ohuhola ehi nenda, ⁹ ne olw'ohwenda ohu kwenda hipalirisa ese Pawulo omusinde omujangafu era oyu babanja mu komera hu lw'ohujeeresa Yesu Kurisito, ohuhusunga busunge ng'owahyo bukolere ehisaaniye mu songa eyi nja hulomaho.

10 Kusunga busunge osonije omwana wange Onesimo* oyu nasaala mu hufugiirira Yesu ni ndi mu komera. 11 Nanyumaho aho Onesimo gaali ajuma mugaso eyi oli aye njaaahani afuuhire wamugaso eyi huli hwembi. 12 Wayire muhoda bugali eyi ndi salireeno ohumuhunjeeresa agobole eyi oli. 13 Nahendire bugali ohumwesigahisa asobole ohupeeresa mu hifo hihyo nindi njano mu komera omu bambona olw'ohulomera abaatu Amanuliro Amalaji, 14 aye sinenda kihole ni tehereeye huhusunga olwohuba nenda hyosihyosi ehi onasaleho hibe ni hinooye hu hwenda huhwo sosi olw'ohuhujalirisa. 15 Hamunga yaali tegeha ya Hatonda, Onesimo ohuhweyibaho, ko hibe ti gahagobola eyi oli asigale n'ali wuwo, 16 cooka n'atali mwidu hyonyene aye n'afuhiire muutu wundi eyi oli. Mu mubiri n'ahiiri mwidu wuwo aye n'ali woluganda olwa Yesu Musengwa era omuhoda ehiena eyi oli, n'ohuhiraho ng'olu ali muhoda eyi ndi.

17 Ale hanye mu butuufu bundiho, era wupeegaho ng'owahyo mu bujeeresa, ganya osangaalire Onesimo ng'olu wahasangaaliye ese. 18 Hanye njalijo esobi eyi gahuhola oba njalijo ehi omubanja, ese ndiise anahaliye. 19 Ese Pawulo aloma ni neewe era ahujandiihiye n'omuhono gwange omwene, nejaayeyo ohuliya. Aye weesi otebirira oti oli ehi oli olwohuba ndiise owahulomera Amanuliro Amalaji. 20 Olw'ehyo owoluganda,

* **1:10** 10 Amahulu g'esiina Onesimo gali ti ow'omugaso.

ganya ohole ehi kusunga ohukolera, omwoyo gwange gwihe. ²¹ Kuḵandiihira bino ni kulimo esuubi era ni nehahasa ti soonahaye hukolera n'ebihiraho ebi kusunga.

²² Ehindi, tegeherenga aḵa ohuḵenyuha, olwohuba suubira ti olw'esaala jenywe banahamboḵolole mu busibe obu ndimo hatyane, naajaho eyo.

²³ Epafuraasi omusibe wahyange yeesi oyu bahaabya ohufugiirira Yesu Kurisito, ahuhehiise.

²⁴ Abaḵeeresā bahyefe: Mariko, Arisitaluuko, Demasi ni Luka boosi bahuheehiise.

²⁵ Ehisasabirisi hya Musengwa Yesu Kurisito hibe hu nywe mwesimwesi.

Endagaano Epyaha mu Lunyole
Nyole: Endagaano Epyaha mu Lunyole (Bible)

copyright © 2019 Wycliffe Bible Translators, Inc.

Language: (Nyole)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

e00787cd-838f-597a-9477-00b97e4e2cff